

## REGIONAL NEWS

HEADLINES:-

1. Kristian te ni pawimawh Jerusalem khawpuia Isua Krista lal anga a luhna ni hriatrengha, 'Tumkau Ni' pualin tukin khan Mizoram puma kohhran hrang hrangin kawng an zawh.
2. Chief Secretary Khili Ram Meena chuan mipuite chu Gas leh tuialhthei sem chungchanga harsatna tawh leh man to zawka hralh chingte sawrkar hotute hnena thlen turin a hriattir.
3. Thla thar ni 21-a vote thlak tura ruahman Aizawl Municipal Corporation (AMC) inthlan atan party hrang hrangten campaign an ngawrh chho hle.
4. Prime Minister Narendra Modi chuan vawiin chawhma dar 11 hian 'Mann Ki Baat' programme kaltlangin ram mipuite hnenah thuchah a sawi dawn.

&lt;&gt;&lt;&gt;&lt;&gt;

PALM SUNDAY

Kristian te ni pawimawh Jerusalem khawpuia Isua Krista lal anga a luhna ni hriatrengha, 'Tumkau Ni' pualin tukin khan Mizoram puma kohhran hrang hrangin kawng an zawh.

Tumkau Ni hi Isua Krista krawsa khenbeh hma Pathianni hnunung bera hman thin a ni a. He ni pual hian Mizoram hmun hrang hrangah kohhran hrang hrangin kawng an zawh a, Kohhran tam zawkah chuan Sunday School zirlai, zirtirtute leh Kohhran mipuite tumkau kengin 'Hosanna' tiin zingkarah khawlai fangin an aurual a, Pathian fakna hla te an sa bawh a ni.

Tumkau Ni pual hian Mizoram chhunga kohhran hrang hrangte chuan chawhma, chawhnu leh zanah inkhawm programme an duang a. Kohhran thenkhatah chuan chawhma Sunday School neiin chawhnu leh zanah Tumkau ni pual in hun an hmang thung a. Kohhran thenkhat chuan Tumkau Ni pual hian thupui bik neiin hun an hmang bawh a, Mizoram District hrang hrangah pawh kohhran hrang hrangte'n an remchan dan ang zelin Tumkau Ni pual hian hun an hmang a ni.

*Tumkau Ni hi khawvel puma Kristian ten urhsun takin an hmang thin a, Lal Isua in Lal anih zia entirnan a ropui taka Jerusalem khawpuia sabengtung no chunga chuanga a luh na ni champha anih avangin Kristiante tan a pawimawh em em a, Tumkau ni-ah hian Lal Isua chawimawia tumkau nena kawng zawh hi naupang tih tura dah deuhna hi a awm thin a, Jerusalem chhehvela mipui, Lal a nihzia la hre Chiang tak tak lotute mahin khati khawpa an chawimawi chuan, keini a hre Chiangtu, thinlung tihvar tawhte hian theihtawpa chawimawi hi kan tih ngei tur a ni.*

&lt;&gt;&lt;&gt;&lt;&gt;

## CLEANLINESS

Urban Development & Poverty Alleviation Department, Aizawl Smart City Limited, Aizawl Municipal Corporation leh Central Young Mizo Association tanghovin Aizawl Khawpui Faina atana Coordination Committee buatsaih, 'Aizawl Khawpui Faina Hnatlangpui leh City Branch YMA Fai Intihsiak' chu nimin khan Vanapa Hall kawtah hawn a ni.

He hun hmanpuitu UD&PA Sec Pu Lalmalsawma Pachuau chuan thu sawiin, ram leh hnam hmangaihna kawngah Faina ngaih pawimawh a tulzia a sawi a. Mizo mipuite chuan mahni ram tia chhal tur an nei chu thil hlu tak a ni tih hriain, a enkawl leh tihfai kawngah pawh mawhphurhna lak a pawimawh thu sawiin, ram pawn atanga Mizoram lo tlawhtute hiptu pawimawh tak leh ram ei leh bar dinhmun tisangtu pakhat chu Faina a ni, tih a sawi a. Faina ngai pawimawh zual zel turin kalkhawmte chu fuihin, 'Aizawl Khawpui Faina Hnatlangpui' leh 'City Branch YMA Fai Intihsiak' chu a hawng nghal a ni.

AMC Municipal Commissioner Pu Joseph H. Lalramsanga chuan hun kaihruiin, Central YMA General Secretary Prof. Malsawmliana chuan Faina kawnga hmalakna chu mimal intin thleng phak a nih theih nan inzirtirna uar deuh deuh a tul thu a sawi bawk a ni.

He hunah hian UD&PA, Aizawl Smart City Limited leh AMC-a thawktute bakah tlawmngai pawl hrang hrangte an tel a. Vanapa Hall kawta 'Faina Hnatlangpui 2026' khuhhawanna neih a nih zawh hnu hian Aizawl khawpui hmun hrang hrangah Faina Hnatlang neih zui nghal a ni.

<><><>

## CHIEF SECRETARY

Chief Secretary Khili Ram Meena chuan mipuite chu Gas leh tuialhthei sem chungchanga harsatna tawk leh man to zawka hralh chingte sawrkar hotute hnena thlen turin a hriattir.

Chief Secretary chuan Sawrkar laipuaia Ministry of Petroleum & Natural Gas kaltlanga ram chhung hmun hrang hranga Gas leh tuialhthei lakluh bakah sem chhuah dan uluk takin a thlithlai reng a ti a. Sawrkar chuan State Sawrkar tin hnenah nitin ei leh bar mamawh tlachham an awm loh nan khauh taka vil reng turin thupek a chhuah bawk a ni.

Chief Secretary chuan sawrkar laipuiin mipuite mamawh lakluh leh sem chhuah dan uluk takin a vil reng tih sawiin mipuite mamawh tam tawk tak a awm tih sawiin chiaina chhan tur a awm lo tih a sawi a ni.

Chief Secretary chuan DC-te chu Gas leh Tuialhthei dahthat awm zat leh sem chhuah dan uluk taka vil a, chhek ruk, man to zawka hralh leh kawng dik lova lak pen a nih loh nana hma la turin a hrih a. District hotute chuan dan bawhchhia an awm a nih chuan Essential Commodities Act, 1955 hmangin an lakah hremna khauh taka dan lekkawh turin a hrih a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## AMC

Thla thar ni 21-a vote thlak tura ruahman Aizawl Municipal Corporation (AMC) inthlan atan party hrang hrangten campaign an ngawrh chho hle. MNF Party in zirtawpni-a an party pisa, Mizo Hnam Runa chung inkhawm an neihah an Legal Board Vice Chairman Pu Lalpianfela Chawngthu chuan thu sawiin khawvelah duh hun huna inthlan puang thin sorkar an awm tih sawiin chung te chu ZPM in an entawn a ti a. VC inthlan hun an sawn hnaih thu leh AMC inthlan hun an tih hlat thu a sawi a. Dan awmsa reng palzutin, lalna leh thuneihna an channa tur hun remchang, an chet that hun thlirin mipui an inthlanpui tih a sawi a. Engtiklai pawha kawng tha neih chu mipuite chanvo a ni a, ZPM sorkar hnuaia mahni vengchhung kawng a chhia a nih chuan ZPM vote nawn tuman an ba lo tih a sawi a ni.

Mizoram Pradesh Congress Committee President Pu Lal Thanzara pawhin zirtawpni-a Political Session an hmanah thu sawiin Assembly Inthlanpuiah an tisual tawh a, AMC Inthlanah Aizawl mipuite chu tisual tawh lo turin a ngen tih a sawi a. ZPM sorkar chuan an intiam ang an ti lo fai vek tih sawiin state sorkarah mipuiten an tifuh tawh lo a, Aizawl khawpui enkawl tur tal chuan tifuh tawh se a duh tih a sawi a ni.

BJP Party chung inkhawma thusawitu Pu Vanupa Zathang chuan BJP Mizoram tan AMC Election chu chona lian tak a ni dawn tih a sawi a. Candidate 11 an nei thei chu lawmawm a tih thu sawiin sorkarna siam thei tur khawp candidate tha an neih thu leh lawmawm a tih thu a sawi baw a ni.

Register-na man chawi ngai lova Health Insurance neih theihna Ayushman Bharat PM-JAY chu Mizo mipuite hriat tlan a pawimawh hle laiin hre lo an tam zawk a, State Sorkar hian mipuite ah zirtirna a pe tam tawh loh vang nge State Health Care Scheme (MUHCS) a sum senga inziak lut an tlem phah a hlau tih hi zawhna a awm thei a ti a, Kum 70 chin chunglam ration card eng pawh neite tana PM Health Insurance Scheme (Aayushman Bharat PM-JAY) cheng Nuai 5 thleng bill theihna a awm a ni tih hriat a pawimawh hle baw a ni, a ti baw.

<><><>

## FISH FESTIVAL

Ni 3 awh Champhai khawpui sira Keilungliah tuikhuah a Nghakuai chiah runpui neih chu nimin khan khar a ni.

Kharna inkhawm hi Fisheries Minister Pu Lalthansanga'n hmanpuiin Mizo-pa thar chhuah ngei hmanga Sangha-a intodelh tumin hma lak mek a ti a, tun dinhmunah Mizorama sangha mamawh za a 24 chauh tharchhuah a ni a, Chief Minister Fisheries Mission kalpui tum hmangin nasa lehzuala sangha tharchhuak tam turin hmalak a ni dawn a ti a CM Special Package hnuaiah Bana kaih policy hnuaiah Cheng Nuai 23.8 chuang pekchhuah tawh a niin mi engemawzat hnenah Sangha khawi kawnga hmalakna turin Loan pek tum a ni baw a ti.

Sangha tharchhuah a lo pun theihna turin Leileta sangha khawi uarin Progress Partnership kalpui tum a ni ti baw a, hei hi Party bil induhsakna atana hman a ni dawn lova, a thawk peih, thawk nasa leh a ti tak tak tur hnenah chauh tanpuina sem a ni ang a, Minister dawhkan atang ni lovin, Fisheries Department Officer te kaltlang zela kalpui a ni ang a ti a ni.

Keilungliah tuikhuaha Nghakuai chiah runpui kharna inkhawm hi Pu Lalrothanga, Fisheries Department Secretary in kaihruaiin Sangha man lian ber, sangha man tam ber, Sangha mantu naupang ber, Hmeichhe sangha man tam ber leh Sangha mantu upa ber te hnenah lawmman Minister leh he huna tel Official ten an hlan a ni.

<><><>

PM MANN KI BAAT

Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 132-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>